

## Winter im Banat

Ich mach die Aue zu un denk an die Winterzeit derhem in Bogarosch, vor villi Johre. Ich kann mer do nor e weiße Winter vorstelle. Die Oma is um halbnacht ufgstann un hat Schnee gschippt un gekehrt. Es hat sich nit gin, dass es Tach is wor, die Leit ins Dorf gang sin un derbei de Schnee vor de Heiser feschtgetret han. Hie un do hat mer angetretni Schneespure gsiehn, die wu noh em Kehre iwrich geblieb sin. Sie han vun deni Leit gstammt, die wu an de Friehtzug gang sin.

Un an de Dachrinne han die Eiszappe ghong. Manchi ware länger, anri kerzer. Nor wann die Sunn rauskumm is, han se anfang zu tripse. Un die Finscherscheiwe, die ware zugfror. Mer hat kenne die Eisblume am Glasgang bewunnre. De Owe is gschiert gin, uns hat do die Kält drauß nix ausgemacht, mir han um de warme Strohowe rum gsitzt, die Nas als ans Finschter gedrickt, um zu gsiehn, obs nit bal Owet wird. Noh is es Eellicht angebrennt gin.

Geger Mittach han mer derfe naus, gut angebumbelt, for e Schneemann baue. De alde Bese war schun griffbereit gericht for als Arm ninstoppe, die dicki Gelrieb for dem Schneemann die Nas mache un de alde Tippe for Hut. Wie der Schneemann fertich war, han mer noch derfe e Schneeballschlacht mache, dernoh je nin, ins Warmi.

Infalle tut mer aach die Zeit, wu im Winter Tuwak gebischelt is gin. Des war natierlich vor Weihnachte. Derbei sin Witze verzählt, Lieder gsung un Gliehwein getrunck gin. Aach es Spinnrad war längscht vum Bode ghol gin, die Oma hat gspunn un for alli Familienmitglieder Wollsocke oder Häntsche gstrickt.

Aach Schliede sin mer gfieht gin, wann de Ota ins Gschäft gang is for Brot holle, hat er uns hiner sich hergezoo. Un schlimre han mer a derfe, bis er ausm Gschäft rauskumm is. Do ware a vill Kaule un wie mer greeßer ware, sin mer dorte Schlittschuh geloff. Un aus dene Kaule sin Eisklumpen rausghackt gin, die hat mer mit Ross un Waan in de Eiskeller gfieht. Dort ware se gelagert bis im Summer, wanns Dreschematze-Liss Gfornes gemacht hat.